



Al s'á stlüt jö la „Care's Salina“

TURISM: La manifestaziun gastronomica s'á sposté tla Sizilia; sodesfat i organisadus

SALINA/ALTA BADIA. La manifestaziun dila „Care's, The Ethical Chef Days“ s'á sposté dal'Alta Badia ala Sizilia sön la ijola de Salina tles Eolie tla provinzia da Messina por na edizium da d'isté dai 21 ai 25 de má.

L'iniziativa - ideada dal cogo cun bëgn döes stères Michelin Norbert Niederkofler dl restaurant St.Hubertus dl hotel Rosa Alpina da San Ciascian y da Paolo Ferretti cun la colaboraziun dl cogo Gianfranco Morelli - röia insciö a süa pröma edizium tla Sizilia.

La Care's á orü ince te chësta edizium da d'isté sottrissé le cojiné gourmet a na manira etica y al é gnü invié adalerch deplü coghi conesciüs.

I ghesc á podü se gode la beliscima contrada dila Sizilia y to pert a marènes o cènes desvalies. Les tematiche è chères dila tera, dl mer y dl'energia, tematiche che á cialé so elemënc ti produc che é gnüs adorá por arjgné ca les derzades. „Salina é na ijola cun na gran energia, dala tera y dal mer ün tut i produc por cojiné.- spliga Norbert Niederkofler - Le travet de chësta manifestaziun é gnü arjunt: urön arjunj n travet etich y sostenibl y sun stá bogh da le arjunje, deache bëgn le 90% de chël che é gnü adoré por cojiné é produc dila Sizilia“, stüj jö Niederkofler.

La manifestaziun á metü man cun na cëna de bëgnodü cun la tradizium gastronomica dila Sizilia cun i coghi Ludovico De Vivo y Martina Caruso adöm a Giuseppe Biuso, Tony Lo Coco, Massimo Mantarro, Giovanni Santoro y Accursio Capraro. La pröma sëra s'á stlüt jö cun na festa por colié le nord y le süd, a chëra che ince la cianó Ferrari da Trënt á tut pert sciöche sponsor.

Tratan la manifestaziun n'ál nia mancé jites en barca o jites por conëscé les erbes y i ciüfs dila Sizilia y al é gnü ince organisé discussiuns sura la sostenibilitè, che é stada la gran tematica dila manifestaziun: la responsabilitè da adoré ci che la natöra se scin-

ca y en so respet. „Le cogo é sciöche n artejann che mëss valorisé i produc dl post te ciasadafüch. Al é important da se fistidié de nosc ambiënt y podun mët man propi cun la spëisa y cun l'alimentaziun“, dij Norbert Niederkofler.

Danter l'ater él gnü dé n pest, le Care's Social Responsibility Award, sponsorisé da Marchesi 1824, che é gnü dé a Francesca Iurlaro por n so laur de inrescida pro l'université da Firenze; ara á tut sciöche ejëmpl le proiet de Norbert Niederkofler „Cook the Mountain“ por lauré fora la tematica etica dila spëisa.

Indöt ál tut pert ala „Care's Salina“ 18 coghi internaziunai, danter chisc le cogo californian David Kinch, le cogo japoneje Tokuyoshi y De Mangeleer y bëgn 16 reladus, danter chisc él incela biologa Mariasole Bianco y le presidënt de TEA Trends Explorer Domenico Fucigna.

I organisadus é stá sodesfac de chësta edizium da d'isté, che gnará organisada ince le proscimo ann.

© Alle Rechte vorbehalten



Da man ciampa: Giancarlo Morelli, Norbert Niederkofler, David Kinch, Paolo Ferretti y Luca Caruso.

Diego Artioli - Formasette